



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

22 Mars 2019

14 Rajab 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

LE TERRORISME « ANTI-ISLAMIQUE »

Eski zot rappel ki vendredi dernier le 15 Mars, Allah (swt) fine dirige moi pou faire mo Khutba lors l'Islam et le terrorisme ? Zot capave alors trouver ki sa c'est bel et bien ene Manifestation Divine. Nous bizin fer *duahs* beaucoup pour le salut de l'Islam et pour toute la nation musulmane, pour tous nous bane frères, sœurs et zenfants musulmans à travers le monde afin ki Allah protège nous tous contre le mal de bane pays anti-islamiques et de bane islamophobes (c'est-à-dire, bane ki ena la haine pour l'islam et ki allergique à l'Islam et à bane musulmans). *Insha-Allah, Ameen.*

Li bien chagrinant ki bane tels actes terroristes zot commis contre bane musulmans. Bane grandes puissances accuse bane musulmans ki zot bane terroristes alors ki nous tous conner ki l'Islam li ene la religion de paix. Le message de l'Islam et du Saint Prophète Muhammad (saws) li adresse non seulement à bane musulmans mais aussi à bane ki pas fine accepté l'Islam et ki néanmoins faire parti de sa message là.

Nous bien-aimé prophète (saws) so message li pou l'humanité ; li fine adresse li à le monde en entier. Le message de l'Islam li ene message de paix, d'amour et de dialogue. Sa c'est bane éléments essentiels ki nous bizin pour entretenir bane bons relations avec bane dimounes parski sans bane bons relations, la vie ti pou couma dire nous pé vivre dans ene la forêt entouré de bane zanimalo féroces.

Le terrorisme pas faire partie de la religion/ foi. Le terrorisme li le reflet de la haine et l'horreur. Bane l'attentats meurtriers à Christchurch en Nouvelle-Zélande vendredi dernier li ene preuve ki l'islamophobie fine vine ene z'outil de propagande et de haine et exprime ene volonté pour exterminer bane musulmans à travers le monde.

Ki sécurité ena pour bane musulmans ki vive dans bane pays kot ena bane dimounes ki allergique avec l'islam et bane musulmans ? Sa acte barbare dans Nouvelle Zélande là fine faire 50 morts, missiés, madames et z'enfants. Zot fine être froidement assassiné dans deux Masjids de Christchurch dans Nouvelle Zélande kot zot ti rassembler comme d'habitude pou faire zot Jummah. Sa c'est le bilan de sa l'attaque terroriste ki fine perpétré par ene ressortissant australien, Brenton Harrison Tarrant, ki fine avoué so crime dans ene longue document de 73 pages, et kot li expliquer kifaire li fine commette ene tel acte maléfaisant contre bane musulmans paisibles. Li fine exprime aussi so regret ki li pas fine capave atteindre so troisième cible, ene Masjid ki trouve dans Ashburton, ki d'après li, dans so plan ti so ti « Bonus ».

Li-même li fine réfère comme so bane sources d'inspirations, bane partis politiques de droite européens et bane les autres notamment français, avec en tête Marine Le Pen, et Donald Trump ki li fine qualifier de « *défenseur de la cause de bane blancs* » (Li fine dire ki Trump li ene symbole pou assure la continuité de l'identité et l'objectif commun de bane blancs). Li faire aussi référence dans so document à Anders Breivik, ene terroriste norvégien, ki ti l'auteur de bane massacres ki ti arriver dans Oslo et Utoya (dans la Norvège). Li assume sans regrets ni remords so bane faits et gestes, et donc sa terroriste ki li fine devini là mérite donc ene punition ki pli sévère ki exister.

Sa bane l'attentats terroristes là fine être condamnés à juste titre, par l'ensemble de bane dirigeants du monde, kot ena certains fine seulement prononce zot condoléances et dénonce sa l'attaque là seulement lors la lèvres, comme par

l'exemple le président de l'Amérique ki, tout en condamnant l'auteur de sa bane l'attentats là, li trouver ki l'idéologie de bane nationalistes blancs li pas ene menace à la paix dans le monde. Par so bane propos déplacer là, li fine gagne beaucoup critiques par bane démocrates ki fine trouve dans li le symbole d'ene renouvellement de l'idée et l'opinion raciste en faveur de bane blancs et ki so l'hostilité envers bane musulmans à travers so bane paroles rempli de la haine et so politique antimusulman ki li fine déclarer, directement ou indirectement, zot responsables en fin de compte de sa bain de sang effroyable ki fine arriver dans ene pays (c'est-à-dire, la Nouvelle Zélande) ki reconnu pour le respect ki li ena pour bane diversité ethnique et culturelle, kot li (la Nouvelle Zélande) ena beaucoup tolérance pour tous bane religions et croyances.

Premier Ministre de Nouvelle Zélande, ene madame, Jacinda Ardern fine personnellement alle rende visite à bane familles de bane victimes pour exprime zot so bane condoléances après ki li fine adresse à la nation saki li fine qualifier de « ene de bane jours ki plus sombres » de so pays. Li fine condamne sans réserves sa l'attentat terroriste contre deux Masjids là et li affirmer ki bane ki responsables de sa pas ena zot place ni dans so pays ni nulle part dans le monde.

Li fine déclaré pendant ene conférence de presse dans Parlement le 15 mars 2019 : *« Pour sa acte de violence là, nous pas fine être choisi à cause ki nous tolère le racisme, ni parski nous ene enclave (ene place ou groupe dimounes) ki tolère l'extrémisme. Nous fine être choisi parski nous pas tous sa là, parski nous représente la diversité, la gentillesse, la compassion, ene foyer pour bane ki partage nous bane valeurs, ene refuge pour bane ki bizin refuge. Et sa bane valeurs là, mo rassure zot, pas pou être, pas pou capave être secoué par sa bane l'attaques là. »*

Sa bane paroles de Madame Premier Ministre de Nouvelle Zélande là li certainement ene réconfort pour bane familles de bane victimes de sa bane attentats terroristes là et sa pou contribuer *Insha-Allah* pou rassure zot et surtout pou rassure bane ki fine choisir Nouvelle Zélande couma zot pays d'adoption.

Le Jamaat Ul Sahih Al Islam et moi-même, en tant ki Chef Spirituel et Khalifatullah, nous condamne sa bane l'attaques terroristes là et nous présente nous bane plus sincères condoléances à bane familles endeuillées et au peuple de la Nouvelle Zélande ki pé soutenir de tout cœur nous bane frères, sœurs et

zenfants musulmans de différentes nations, ainsi ki bane familles de bane victimes de bane l'attaques terroristes du 15 Mars 2019. Nous de tout cœur avec sa pays là et nous prier pour ki la société de la Nouvelle Zélande retrouve so sérénité et so la paix légendaire ki fine toujours caractérise li.

Bane victimes là ti sorti de quatre coins du monde, bane pays couma Pakistan, la Turquie, l'Arabie Saoudite, Bangladesh, l'Indonésie, Malaisie et aussi Maurice. Pendant Jummah dans l'après-midi le 15 Mars 2019, Brenton Tarrant fine tire coute fusil dans Masjid Al-Noor dans le centre de Christchurch. Ensuite li fine dirige li vers centre islamique de Linwood ki trouve à cinq kilomètres de là et li fine contigner so massacre.

Sa bane l'attaques ki fine perpétre contre deux Masjids dans Christchurch fine faire 50 morts et 50 blessés, et parmi ene Mauricien aussi fine tomber sur le coup de bane balles de sa terroriste là. So nom c'est Moosid Mohamed Hossen, ki ti âgé de 53 ans.

En mo nom personnel et au nom de tous bane membres du Jamaat Ul Sahih Al Islam, mo tenir encore ene fois à exprime nous plus vives sympathies à tous sa bane familles là, ainsi ki à la famille de sa Mauricien ki fine victime de sa l'évènement tragique là. Ki Allah gagne pitié lor zot, accorde zot So miséricorde et donne zot ene place élevé dans *Jannat. Ameen.*

Mo souhaiter à saki bane États-Unis l'Amérique, bane Nations Unies, l'Union Européenne et l'ensemble du monde arabe arrête faire « sourde d'oreille » par rapport à bane l'évènements ki pé passer dans Cachemire, dans la Chine, dans la Syrie, dans l'Inde, dans Birmanie, dans Myanmar etc.

Mo déplore le fait ki ena que quelques pays et chefs d'État ki fine prononce zot lors sa l'attentat là et fine qualifier sa acte là couma ene acte terroriste, tandis ki les autres couma l'Italie pas fine ménage so bane mots sarcastiques contre l'attentat en li-même. Quelques de so bane ministres actuels zot être connus couma bane islamophobes, et bane défenseurs de bane droits de bane blancs. Le Vice Premier Ministre de l'Italie d'extrême droite, Matteo Salvini fine zis lors la lèvres condamne sa bane attaques là, couma dire zis comme ene show, parski le monde pé guette li, mais selman li ajouter ki : « *Seul extrémisme ki nous bizin prend compte c'est saki Islamique là (extrémisme islamique).* »

Ena zis quelques-z'uns ki fine qualifié Brenton Tarrant couma terroriste, sinon la plupart fine qualifier li de simple tireur/ shooter. Quel hypocrisie ! Si sa même dimoune là ti ena ene nom musulman et ti touye bane non-musulmans, zot ti pou tout de suite qualifier li de terroriste. Le Jamaat Ul Sahih Al Islam reste solidaire envers bane musulmans de Nouvelle-Zélande, et ressenti la peine de bane familles endeuillées. Sa li certainement ene épreuve bien bien dure pour zot. Nous espérer ki bane l'autorités de la Nouvelle Zélande prend bane mesures ki bizin et ki la communauté internationale condamne sa acte barbare là.

Mo faire ene appel pour ki nous faire *duahs* pour bane dimounes innocents ki fine trouve la mort dans sa attentat là. Nous fer *duahs* avec Allah pour ki zot l'âmes repose en paix. Zot bane innocents ki fine morts dans ene lieu sacré. Nous faire *duahs* pour ki le Créateur (nous Rab, nous Allah) accorde zot le *Jannat-ul-Firdaus*. Nous faire *duahs* pour nous bane frères, sœurs et zenfants musulmans ki pé souffert de par le monde en entier.

Et nous faire *duahs* aussi pour tous bane victimes innocents et bane ki fine perdi zot la caze et ene place pou rester dans bane calamités ki fine passer de par le monde récemment, et ki zot dans bane situations pénibles, couma dans Mozambique kot cyclone Idai fine faire ravage, l'Australie, Brésil, l'Indonésie, Kenya, Malawi, Mexique, Papouazie-Nouvelle-Guinée, Sud Afrique, Tanzanie, Ouganda, parmi tant d'autres ki fine touché par bane inondations et bane glissements de terrains, bane incendies, bane tornades et bane maladies. *Insha-Allah, Ameen, Summa Ameen, Ya Rabbal Aalameen.*